



Ndoengfaexcuk Mbanj Gou

家乡的竹林

德保县都安中心校四(1)班 许美妹

Mbanjranz gou haujlai gingisaek gyaue-ndei, danhseih gou ceiq gyaek gingisaek ndoengfaexcuk mbanjranz gou.

Ndaw ndoengfaexcuk gofaexcuk maed-maed caedcaed. Gyoengqde hung iq mbouj doengz. Mizmbangj hung lumj bak boi, hoeng mizmbangj saeq lumj ganj bit. Danhseih moix go faexcuk cungj dwg yienghneix heu yienghneix daengj.

Seizcin, rumzcin lumj dahsau unqswnh yienghneix byaij daeuj lo, goranz deng rumzcin dahsau heuh singj lo. Gyoengqde ndonj ok najnamh. Fwncin doek roengzdaej, gyoengqde couh maj ndaej engq angq lo. Rumzcin hawj roranz bok caengz buhvaq de, vuenhwnj buhmoq saekheu, gyoengqde lumj bouxbou lwgsau gyaunde, ndwn soh youq

ndaw seizcin gyaunde haenx.

Daengz le seizhah, gyoengqde mbehai gaiq fwngz, fwdad dwk, riengz rumz diuqfoux, gyaunde raixcaix.

Seizcou mboujrox seizlawz daeujdaengz lo. Rumz dahcej soengq daeuj gij hom lwgmak, mbin haeuj ndoengfaexcuk, mwngz byaij haeuj ndoengfaexcuk couh mup daengz gij feih hom, mbawfaexcuk youq yangrumz diuqfoux, gyaunde raixcaix.

Seizsou gvaqbae, seizdoeng daeujdaengz lo, go'nywj gofaex cungj bienq henj lo. Hoeng gofaexcuk lij heuswdsd, riu dwk ndwn soh-ngwdngwd riu coh rumznit fwnae.

O! Ndoengfaexcuk mbanj gou caen gyaunde ha!

(指导老师:赵连佩)

Fungsaeng Sij Hawj Daxmeh Ndeu

给妈妈的一封信

贵港市覃塘区蒙公乡高占小学四(1)班 李基



Daxmeh ginggyaez:

Mwngz ndei, youq gwnz loh ciuhvunz, miz haujlai saeh sawj gou gamjdaengz mwngz doiq gou aencingz naeklaeg, ngoenzneix, gou ciq aen sawsaeng bijsai neix docih mwngz. Youq neix, gou cij siengj gangj gienh saeh fatseng youq gou doeg it nienzgaep haenx, mbouj rox mwngz lij geiq ndaej lwi?

Ngoenzhaenx dwg banhaemh, gou caeuj daxbuz gwn caeuz le, couh youq daihdng caj mwngz, itcig daengz it diemj cung, lij caengz raen mwngz dauqma. Daxbuz gangj: "Lan ha, bae ninz ba!" Gou gangj: "Mbouj, gou lij aeu caj daxmeh." Doeklaeng, gou dingj mbouj gvaq non raeujninz, ninz caem bae lo.

Gou cingq da'w moengzloengz, dingqnyi dou yiengj, sikhaek doeksaet ndiu lo, gou couh buet roengz laeuz bae yawj. Yienzlaiz dwg mwngz dauqma lo, cijraen mwngz rag aendang dwgrengz dwk yamq haeuj bakdou, gou caem boi caz bongh gvaqbae: "Daxmeh, mwngz bae gizlawz ma?" Daxmeh riu dwk daj ndaw daehnaeng gaem ok bonj 《It Diemj Doeng》gig moq ndeu. Seizhaenx, raemxda gou sikhaek doek roengzdaej lo. Song ngoenz gonq, gou saeux mwngz cawx hawj gou, mwngz mboujmiz seizgan, gou lij hozndat ne, laihnaeuz mwngz mbouj gyaek gou, siengj mbouj daengz……Yienzlaiz mwngz dwg bae ndaw diemq cawx bonj saw neix seiz, fatyienh aen diemq haenx gaeng gai caez lo, couh byaij bae daihngaih aen diemq, daihsam aen……Doeklaeng, youq aen diemq bienbik ndeu ra raen lo.

Daxmeh, docih mwngz! Docih mwngz vih gou yungh gij simrwed.

Hoh

Ndangdae ndei, gunghcoz ndei!

daeglwg mwngz: Siujgih
2011 nienz 6 yied 7 hauh
(指导教师:张燕)

Daxmeh, Gou Muengh

妈妈,我希望

武鸣县仙湖镇中桥小学五(2)班 詹洁

Seizgan gvaq ndaej caen vaiq, baez yaep da, couh yaek daengz cieng lo. Gou muengh ndaej lumz gij saeh gaeuq, hoeng mizmbangj saeh hawj gou caen hoj lumz, gij saeh haenx cungj oemq youq ndawsim gou, baez siengj daengz gvaq cieng, gou couh hojsouh. Gou caeux couh siengj lwnh lo, danhseih mbouj rox lwnh naeuz byawz nyi, daxmeh, ngoenzneix gou gietdingh lwnh hawj mwngz, muengh mwngz dingqdingq.

Daengz cieng lo, daengz cieng lo, lwgnyez bouxlaux cungj angq hwnjdaej, ranz dou hix ityiengh, cingq comz youq itheij gwncaez ne. Gwnz daiz byaek caen lai ha, nohgaeq、byaseng、nohbit、gouyuz, baij youq gwnz daiz rim lo, daxmeh, mwngz lumj rox bienq mohsuz nei, yaengx hwnj bingz gojloz, gou vaiqvaiq yaengx aen cenj gou okdaeuj daengj. Meh, mwngz raix hawj dahnuengx caen lai, bingzdawz aen bakcenj lo. Mwngz hix raix hawj gou yienghneix lai couh ndei lo, ndaw sim gou naemj dwk, mwngz raix hawj gou lo, cij raix byongh cenj iq, gou ndoet ndaej song sam gaemz couh liux lo, gou dajbak dwk, cungj feihdauh neix hawj gou yied gwn yied ngah, ngamq yaengx aen cenj hwnjdaej siengj heuh mwngz dem di he hawj gou, yawjraen mwngz dawz doengh gij fwdgaeq gou ceiq gyaek gwn haenx cungj cienzbouh nip hawj dahnuengx lo, cingq riunyumnyum daeuj dahnuengx, doiq gou mbouj yawj mbouj cam, yawj daengz yienghneix, gou gwn yienghlawz cungj gamjdaengz lumj miz oen coeg hoz nei, ndwnj hix ndwnj mbouj roengz. Daxmeh, gou yawjraen mwngz yienghneix cungh dahnuengx gou caen dahoengz, muengh mwngz hix ndaej yienghneix doiq gou.

Fat cienznyok lo, mwngz dawz aen hungzbauh okdaeuj, yaengx hwnjdaej, yienzlaiz dwg hawj dahnuengx, gou hix youq henz ndang mwngz lo, hix mbouj raen mwngz hawj gou, gou nyaenx mbouj ndaej couh cam: "Gij gou ne?" Cij ndaejnyi mwngz aeu ndaeng han coenz "wng", swnhfwngz daj ndaw daeh mbon ok mbaw ngaenz haj maenz, gveng youq gwnzdaiz, youh caeuj dahnuengx guh'angq dwk. enndaeng gou soemjsetset. Daxmeh ha, gou muengh mwngz hix lai ndiep gou, lumj mwngz ndiep dahnuengx yienghneix ndiep gou.

Dingq ndaejnyi daxboh heuh gou bae cuengq bauq lo, gou cij singj gvaqdaeuj, ww aa naeuz: "Mwngz……gyoengqsou bae ba, gou yaek yawj cunhcez lenzvuenh vanjvei."

Doengxhaemh gij gingisaek baihrog dwg yienghneix gyaue, ndaw densi gij cezmuz haenx dwg yienghneix mizyinx, danhseih gou hix mboujmiz sim yawj. Gyoengq vunz cungj naeuz: "Ndaw cieng ndaw cieng, vunzlaux simnyap, lwgnyez sim'angq." Hoeng gou angq mbouj hwnj, daxmeh mwngz rox lwi, gou mbouj dwg muengh haj maenz ngaenz haenx, cix dwg ngah ndaej gij raeujrub unqswnh mwngz!

(指导老师:潘丽云)

